

ՓՈՔԻ ՄՀԵՐ: ԳԵՆԵԶԻՍ ԵՎ ՏԻՊԱԲԱՆՈՒԹՅՈՒՆ

Փոքր Միերը մեր ազգային էպոսի չորրորդ ճյուղի գլխավոր հերոսն է: Ի տարբերություն իր նախորդների, որոնք լիովին դրական են, ունի երկակի էություն: Երկվությունը արտահայտվում է նրա մի շարք արարքներով (մանկական չարություններ, մեծամարտ հոր հետ և այլն), որոնք միանշանակ գնահատել հնարավոր չէ: Միերի ճյուղը կազմում է մեր վեպի հնագույն տարրերը, այդ պատճառով չորրորդ ճյուղի ծագման և զարգացման հարցերի քննությունը հնարավոր է դառնում ուսումնասիրելով հնդեվրոպական առասպելաբանությունը, մեր և հարևան ժողովուրդների հնագույն հավատալիքները, կրոնական համակարգերը և որոշակի պատմական տարրեր, որոնք յուրաքանչյուր էպոսի անբաժանելի, թեև ոչ գլխավոր մասն են կազմում:

Հարցի պատմությունը առնվազն մեկրայրյա վաղեմություն ունի:

Գ. Մրվանձոյանցը 1874թ. Կ. Պոլսում հրատարակված «Գլոց ու բլոց և Սասունցի Դավիթ կամ Միերի դուռ» աշխատության առաջաբանում անդրադառնում է Միերի դեպքի մասին պատմող ավանդություններին և եզրակացնում. «Միերըն ինքն գուցե Միիր Մեծն լինի և յուր դուռը ուղղակի հարավո հանդեպ կամ արևու լինելով՝ պաշտելու պատշաճ»¹:

Այս դրույթը՝ Միեր-Միր, իր շարունակությունն է գտնում հետագա ուսումնասիրություններում:

Երկու տասնամյակ անց Մ. Էմինը գրում է. «Михр есть Meher, Mitra, Mithras древних»²:

Շուրջ մեկ տասնամյակ հետո այս մասին գրում է Մ. Աբեղյանը. «Նոր վեպի մեջ եղած դյուցազնական առասպելները՝ համեմատելով մեր հին առասպելներին՝ գտնում ենք, որ հին առասպելները գրեթե ամբողջությամբ մտել են նոր վեպի մեջ, այն էլ նույն դասավորությամբ, որ ունին այդ առասպելներն մեր հին վիպասանքի մեջ որոնց բոլորի կենտրոնն է վիշապների դեմ կռվելը: Մեր հին առասպելների ու նոր վեպի մեջ եղած առասպելների նույնությունն այն աստիճանի է, որ կարելի է կարծել, թե վեպը նույն հին վիպասանքն է: Նոր վեպի մեջ հին վիպասանքից դուրս է ձգված բոլոր պատմականը՝ պատմելով միայն դյուցազնական առասպելները՝ Սանասար Դավիթ և Միեր անունների տակ»³:

Ուսումնասիրվող քեմայի վերաբերյալ մյուս կարևոր հայտնագործությունը, որ գրեթե միաժամանակ կատարել են Մ. Կանայանցն ու Մ. Աբեղյանը, այն է, որ էպոսում սկզբնապես եղել է մեկ Միեր, հետո դարձել է երկու: 1907թ. Մ. Կանայանցը գրում է. «Սկզբում վեպը ունեցել է միայն մի Միեր... բայց հե-

տող երկճեղքվել է... վեպի փոփոխականների մեծ մասն ունին երկու Միեր. Միեր-Մեծ, Առյուծաձև Միեր և Միեր-Միերիկ, Պատիկ Միեր»⁴:

Գրեթե նույնը ասում է Մ.Աբելյանը. «Առյուծաձև Միեր-այս Միերն իսկապես կրկնությունն է Պատիկ Միերի»: Այս ամենով համոզե՛ր՝ գիտնականը տարակուսում է. «Միերի անձի մեջ միացած են երկու Աշոտի (Դավիթ Բագրատունու եղբայր Աշոտի ու Դավիթ Բագրատունու որդի Աշոտի) գլխին եկածը: Բայց ազդած է անշուշտ և Սասնո վերջին իշխանի Շահնշահի պատմությունը հետագա դարերում: Պատմական դեպքերի հիշողությունը պարզ երևում է, բայց թե ինչպես ոչ թե Աշոտ կամ Շահնշահ անունն է պահված, այլ Միեր, այդ մենք բացատրել չենք կարողանում»⁵:

Թեմայի նորագույն և ընդհանրական ուսումնասիրությունների համար պարտական ենք բանահյուսագետ՝ Սարգիս Հարությունյանին, որը Փոքր Միերի ճյուղում արտացոլված է գտնում հնդիրանական Միթրայի և մեր Միերի պաշտամունքին բնորոշ տարրեր⁶: Նա, ինչպես նաև էպոսագետ Արմեն Պետրոսյանը, հիմնականում առասպելաբանական բազմազան նյութի հիման վրա բազմակողմանիորեն քննում են մեր և հարևան էպոսները⁷: Հատկանշական է նաև էպոսի պոետիկայի վերաբերյալ պրոֆեսոր Ազատ Եղիազարյանի աշխատությունը⁸:

Ուսումնասիրելով Փոքր Միերի մասին բոլոր պատումները՝ ակնհայտ է դառնում, որ կերպարը տարրորմակ է ու բազմատարր: Ունենալով նաև դրական հատկանիշներ՝ Փոքր Միերը գլխավորապես չար է, համեմայնդեպս այդպես է ընկալվում: Միերի մեծան էության բացատրությունը էպոսում մենք գտնել չենք կարող, քանի որ այն շատ հին է և իր արմատներով գնում է դեպի հնդեվրոպական առասպելաբանություն: Կերպարի քննության բարդությունը նաև կապված է հետագա դարերում հնդեվրոպական առասպելների կրած փոփոխությունների հետ: Բացի այդ, կերպարը երկճեղքվել է երկու Միերների, հետևաբար բաժանվել են կերպարակազմի՝ հատկանիշները, որոնց միասնությամբ միայն կարող ենք համապարփակ քննություն կատարել:

Յուրաքանչյուր՝ առավել ևս հին էպոս մեզ է ներկայանում որպես առասպելական, պատմական և կրոնական-հավատալիքային տարրերի ամբողջություն: Բացի այդ՝ մեծ տեղ են գրավում՝ զուտ բանահյուսական, ազգագրական և կենցաղային տարրերը:

Էպոսի ճևալորման հիմնական և կարևորագույն միջոցները առասպելներն են: Էպոսը կազմող առասպելները մեծ մասամբ պատմում են տվյալ տոհմի, ցեղի, ազգի նախահայրերի կամ մշակութային հերոսների մասին: Վաղ շրջանի էպոսը ստեղծվել է տոհմացեղային հասարակարգի առաջացման ժամանակ և հերոսականությունը դեռևս համդես է գալիս առասպելների տեսքով: Այս շրջանում դեռ պատմականությունը խառնված չէ առասպելներին: Ավելի ուշ ստեղծված պետությունները, կազմավորված ազգերը վիպական միջոցներով սկսեցին արտացոլել իրենց գոյությունը: Բայց պատմական

հանդերձով էլ առասպելը լիովին չկորցրեց իր դերը և նշանակությունը: Հերոսական կռիվները թշնամիների դեմ, որոնք Էպոսների հիմնական գաղափար-թեմաներն են, ավելի վաղ շրջանում տիեզերածնական, տիեզերակարգավորման պայքարն էր քառսի դեմ: Քառսի ուժերը պատկերվում էին վիշապների, օձերի դերի տեսքով: Հրեշների դեմ պայքարում են շումեր-աքքադական Գիլգամեշը, վրացական Ամիրսանը, հին հունական հերոսներ Պերսևսը, Թեսևսը, Հերակլեսը: Վաղ Էպոսում հերոսների արարքների ունեն դիտակտիկ բնույթ: Էպոսի հերոսները շատ դեպքերում ընկալվում են որպես տոհմի նախահայր, օրինակ, ինչպես մեր Էպոսում երկվորյակ եղբայրները՝ Սանասարը և Բաղդասարը, որոնք հիմնում են Սասունը: Սանասարը և Բաղդասարը ղրական, Էպիկական հերոսներ դարձած առասպելական, աստվածային երկվորյակներ են: Շատ դեպքերում առասպելական հերոսները, որոնք նույնիսկ պատմական նախատիպեր ունեն, նույնացվում են աստվածներին և նրանց տարբեր գործառնություններին: Այս դեպքում հերոսների պայքարը վերածվում է աստվածային պայքարի, կամ աստվածների պայքարը արտահայտվում է հերոսների պայքարով: Ընդհանրապես, ըստ առասպելատեղծ մտածողության՝ ամեն մի նշանակալից գործողություն կրկնում է տիեզերածնության գործընթացը, ամեն մի նշանակալի կռիվ, մենամարտ, պատերազմ համարվում է տիեզերածին պատերազմ⁹: Եվ այդ պատերազմում հաղթած հերոսի կամ աստծո հետ կարող են համեմատվել բոլոր պատմական և վիպական արքաները կամ ազգային ցեղային հերոսները: Այս առասպելները սեմանտիկորեն անսպառ են և իրենց ներսում արդեն պարունակում են արվեստի, կրոնական համակարգի և բնության ու հասարակության առաջացման մասին պատկերացումների սաղմեր: Հետագա զարգացմամբ մշակութային հերոսը կարող է վերածվել աստծո: Սակայն հիմնականում առասպելական մշակութային հերոսը պաշտամունքային անձի չի վերածվում, այլ վերափոխվում է ազգային-էպիկական կերպարի: Նման դեպքում Էպոսի հերոսը նույնիսկ գրական-բանահյուսական տեքստում պահպանում է աստծու վերածվելու հնարավորությունը, այսինքն կրում է չիրագործված աստվածային գործառնություններ: Էպիկական տեքստերում պահպանված առասպելական տարրերը հարակցվում են պատմականությանը, բայց վերջինս արտահայտվում է ոչ թե այս կամ այն փաստի ճշտությամբ, այլ շատ դեպքերում լոկ ճիշտ աշխարհագրական անունների ներմուծմամբ և նյութի մատուցմամբ: Էպիկական ստեղծագործություններում արդեն ոչ թե աշխարհի ստեղծման առասպելներն են, այլ այս կամ այն ժողովրդի ազգային պատմության հիմնադրման տարրերը: Առասպելի պես Էպոսը նույնպես մտածվում է որպես իրական պատմություն և բացարձակ ճշմարտություն, ի տարբերություն հեքիաթի, որը գրեթե նույն առասպելն է, սակայն վերջինս գիտակցվում է որպես սուտ:

Պատահական չէ, որ պատմողները համարում էին «Մամա ծոեր» Էպոսի իրադարձությունները իրականում տեղի ունեցած, ցույց էին տալիս է-

պոսի հերոսների գործունեության վայրերը, հետևանքները, պարագաները: Նման մեկնաբանությունները վկայում են, որ էպոսը կազմող նախնական առասպելները արդեն պատմականացվել են և ստացել օբյեկտիվ, պատմական իրողության արժեք: Փաստորեն տվյալ դեպքում առկա է միջի կազմաքանդում և իրական, պատմական ժամանակի ներմուծում:

Մեր էպոսի չորրորդ ճյուղում տեսանելի են տարբեր վաղեմության առասպելների մի քանի խումբ՝ հնդեվրոպական հիմք առասպել, երկվորյակների և մշակութային հերոսների մասին պատմող առասպելներ և այլն: Այս առասպելների տարրերի, նրանց ներթափանցվածության, էպիկական և պատմական տարրերի հետ նրանց հարաբերությամբ էլ կարող ենք պարզել Փոքր Մհերի կերպարի ձևավորման ընթացքը:

Հայտնի է, որ «Մասնա ծռեր» էպոսի հիմքը հնդեվրոպական առասպելաբանության հիմնական առասպելն է: Այդ առասպելը հայտնաբերել են Իվանովը և Տոպորովը: Ամպրոպի աստվածը կոլում և հաղթում է օձավիշապին, ապա մեծահոգաբար նրան ներում: Դրանից հետո աստծո կինը սիրային կապի մեջ է մտնում վիշապների գլխավորի կամ հենց այդ վիշապի հետ, ապա պատժվում է որդին և փակվում ժայռում, լեռան մեջ, քարայրում՝ հարություն առնելու, վերադառնալու հույսով:

Այս առասպելը նախքան էպոս մտնելը, զարգացման երկար ճանապարհ է անցել: Առասպելի առաջին տարբերակները գտնում ենք Մ.Խորենացու «*Հայոց պատմության*» մեջ: Ամպրոպի աստծո առաջին հիշատակությունը Վահագնի առասպելն է, որը հետո պատմականացվում է, և «*Վիպասնքուն*» արդեն Վահագնը Տիգրան արքայի որդին է: «*Տիգրան և Ածղահակ*» առասպելում այդ հնդեվրոպական հիմք առասպելը լիովին առկա է: Հաջորդ դրվագում արդեն մենք հանդիպում ենք Ածղահակի զարմին՝ վիշապազուններին և նրանց գլխավորին՝ Արզամին, Արտաշեսի որդի Արտավազդի հետ միասին:

Այս առասպելը որոշակի չափով առկա է նաև թերևս Տիգրանի քրոջ և Ածղահակի ամուսնության, և մեր ժողովրդական էպոսում՝ Ծովինարի և կտապաշտ թագավորի կապի դրվագներում:

Տիպաբանորեն և ծագմամբ՝ Փոքր Մհերի նախորդը Արտավազդն է: Արտավազդի առասպելը, լինելով ավելի վաղ շրջանի նմուշ, մեզ ուղղակիորեն առաջնորդում է դեպի հնդեվրոպական առասպելաբանություն և հավատալիքներ: Մհերը և Արտավազդը դրսևորում են որոշակի երկակի էություն: Մի շարք դրվագներում նրանք չար են, մի քանիսում բարի: Նույնիսկ Մհերի քարայր մտնելու դրվագը չի կարելի միանշանակ գնահատել: Այն հեռացում է, պատիժ, հոր հետ մեղամարտի կամ նրա դեմ ինչ-որ ձևով դուրս գալու համար: Առաջին հերթին հոր հետ բախման, անեծքի, հեռացման առասպելատարրերով էլ Փոքր Մհերի ճյուղը կապվում է հիմք առասպելի հետ:

Չորրորդ ճյուղում հանդիպող առասպելների երկրորդ խումբը՝ երկվորյակների մասին պատմող առասպելներն են: Առասպելների այս խումբը բավական հայտնի է և հանդիպում է աշխարհի գրեթե բոլոր ժողովուրդների և հատկապես հնդեվրոպացիների մախնական պատկերացումներում: Երկնքից, որը արական սկիզբ է, առաջանում են նրա երկվորյակ որդիները: Երկվորյակ որդիների մայրը հողն է՝ իգական սկիզբը: Իգական սկիզբը շատ դեպքերում հանդես է գալիս մեռնակ, այսինքն՝ առանց երկնքի, և իր մեջ միավորում է քննության երկու կարևորագույն տարրերը՝ կրակը և ջուրը: Նրանք ներդաշնակ հակադրամիասնություն էին կազմում, ինչպես Արևը և Լուսինը, որոնք կամ քույր ու եղբայր էին, կամ ամուսիններ: Մտածողության մախնական ձևերում առկա է մեկ արարող էություն՝ երկու սկզբով՝ բարի և չար: Շովիմարը, որպես արարող էություն, ծնում է երկվորյակ եղբայրներ Մանասարին և Բաղդասարին, այսինքն ոչ թե երկու զավակ՝ առանձին-առանձին, այլ միաժամանակյա, մույնական ծնունդ:

Մեր էպոսի կառուցվածքային առանձնահատկությունները թույլ են տալիս ենթադրել, որ վեպի բոլոր հիմնական տարրերը այս կամ այն կերպ առնչվում են այս առասպելներին: Երկվորյակն զաղափարի վրա կառուցված է մեր ողջ վեպը: Այս հնագույն և տիեզերածին առասպելը ունի բազմազան դրսևորումներ: Երկվորյակները կարող են լինել և՛ եղբայրներ, և՛ ամուսիններ, և՛ քույր ու եղբայր: Նրանց թիվը կարող է շատ լինել, վերածվել եռյակի կամ ինչպես հնդեվրոպական առասպելաբանության մաս կազմող խեթական առասպելում է՝ երեսուն երկվորյակ եղբայրներ, որոնք թագուհի Կանիշայի որդիներն էին¹⁰:

Առասպելի տարածված արտահայտությունն է երկվորյակներից մեկի զեղչումը: Այսպես՝ պարսկական էպիկական հերոս Ջամշիդի անունը սկզբնապես նշանակել է «երկվորյակ-արքա», բայց էպոսում նա երկրորդ եղբայր չունի¹¹: Մակայն առավել ակնառուն հանրահայտ Պրոմեթևսի դեպքն է, որը շատ ընդհանրություններ ունի հենց մեր քննության առարկա Փոքր Միեթի հետ:

Ըստ որոշ աղբյուրների՝ Պրոմեթևսը ունենում է եղբայր՝ Էպիմեթևս անունով: Եղբայրը Պրոմեթևսի հակադրությունն է, նրանք հակադրվում են մույնիսկ անուններով. Պրոմեթևս նշանակում է *մախաամիտ, կանխագուշակող*, իսկ Էպիմեթևս՝ *հետո մտածող, հետին մտքերով հարուստ*: Մակայն աղբյուրների մեծ մասում Էպիմեթևսը բացակայում է, և նրա հատկանիշները մենք գտնում ենք Պրոմեթևսի մեջ, որը արդեն ունի երկակի էություն: Այս տեսանկյունից նման հակադրամիասնության արդյունք կարող է լինել նաև Փոքր Միեթի երկվորյունը:

«Մասնա Շոեթ» էպոսը մի կտու համակարգ է, որտեղ ճյուղերը միմյանց հետ կապվում են նաև միանման տարրերի առկայությամբ: Առաջին երեք ճյուղերում տարբեր չափով նկատելի են երկվորյակների առասպելի տարրեր

և կարելի է ենթադրել, որ Փոքր Միերի ճյուղում, այն նույնպես ինչ-որ արտահայտություն գտնում է: Տվյալ դեպքում հերոսներից մեկի զեղչման տեսքով:

Հետագայում՝ առասպելների զարգացման ավելի ուշ՝ վիպականացման շրջանում, հանդես է գալիս առասպելական հերոսի կատեգորիան: Հենց հերոսներն էլ երկու տարբեր հարթություններում տարբեր կերպ են ընկալվում: Նրանք չար են համարվում, որովհետև դուրս են գալիս աստվածների դեմ և օգնում մարդկանց, ինչի համար էլ արժանանում էին պատժի կամ արտաքսման: Հետաքրքիր է, որ չնայած Դավիթը և Միերը կրկնում են իրենց նախորդներին, որոնք ավելի շատ աստվածային ընդգծված հատկանիշներ ունեն, բայց նրանք էպիկական հերոսներ են: Հերոսը աստվածության և մարդու խառնուրդից է ծնվում: Նա միշտ հիշատակվում է որպես քաջ ռազմիկ: Հերոսական հատկանիշները տեսանելի են ծնունդից սկսյալ: Որպես կանոն՝ նա անսովոր ծնունդ է և հենց ծննդյան առաջին օրերից ցուցաբերում է հրաշալի հատկություններ և կարողություններ: Դա լավագույնս երևում է Փոքր Միերի դեպքում: Չհաշված նրա մանկական չարությունները, կան պատումներ, որտեղ Միերը ցույց է տալիս իր արտասովոր ուժը դեռ բարոյում¹²: Շատ առասպելներում ուժի սկզբնական ցուցադրումն էլ կանխորոշում է հերոսների բախումը: Հաճախ բախման պատճառը հոր, հորեղբոր կամ քեռու կողմից տրվող դժվար առաջադրանքներն են: Մեր էպոսում նույնպես կա նման դրվագ: Քեռիները խաբում են Միերին, և հերոսը նրանց սպանում է, դրանով իսկ նախապատրաստում հոր հետ բախումը, որն էլ ավարտվում է կամ հոր մահով կամ որդու անհիմկելով և տվյալ հասարակությունից բռնի հեռացմամբ: Սա երևում է և Արտավազդի, և նրա անմիջական հաջորդ Միերի դեպքում¹³:

Նախնադարյան հասարակարգում հայրը համարվում է տոհմի տոտեմ կամ աստված: Այստեղից էլ ծնվում են աստծո դեմ կռիվող հերոսները: Հունական առասպելներում սրա արտահայտությունը Պրոմեթևսն է, որը աստվածներից գողացավ կրակը, տվեց մարդկանց, ապա և արժանացավ նզովքի և պատժի: Այս կետում Պրոմեթևսի հետ տիպաբանական ընդհանրություններ են դրսևորում Կովկասա-Իբերական առասպելաբանության որոշ հերոսներ, մեր Արտավազդը և Փոքր Միերը: Կովկասա-Իբերական հերոսներ Ամիրանը, Աբրասկիլը, Բաուրաձան նույն գործառույթների կրողներ են, ինչն էլ հանգեցնում է նրանց և աստվածության ընդհարմանը, անխուսափելի պարտությանը և պատժին: Իսկ էպոսում Միերը կարող էր բախվել միայն հոր՝ Դավթի հետ, թեև պատումներից մեկում առկա է հրեշտակների հետ բախման մոտիվը¹⁴:

Բացի աստծո, ծերացած թագավորի, կամ հոր հետ կռիվները, հերոսների տոհմից վտարման պատճառը շատ հաճախ դառնում է տաքրոի խախտումը: Ամենատարածված խախտվող տաքրոն արճապղծությունն է:

Որոշ հին հասարակարգերում արճապղծությունը թույլատրվում է, և համարվում է առատության և պոդարերության նշան: Սակայն այստեղ այն լուրջ արգելք է: Հերոսը կարող է չխախտել այդ արգելքը, բայց նրան կարող

են մեղադրել և արտաքսել սոցիալմից: Պատումների մեծ մասում հանդիպում է այն դրվագը, երբ Ջենով Հովանի կինը ցանկանում է զայրակղել փոքր Միերին, որոշ դեպքում նաև «*դուցազուն*» որդի ունենալու նպատակով: Հերոսը ընդդիմանում է, բայց կինը կարողանում է խաբել ամուսնուն և Սասնա տան «*խաղը*» վտարվում է¹⁵: Այս դրվագը պատմվում է նաև Դավթի վերաբերյալ: Ինցեստը բախման գլխավոր պատճառներից է:

Ըստ ընդունված կարծիքի, բախումը ունի իր սոցիալական հիմքը, այն է՝ նահապետական գերդաստանի քայքայումը և անհատական ընտանիքի կազմավորումը: Այլ տեսանկյունից հոր և որդու, աստվածության և հերոսի բախումը կարելի է բացատրել մտածող անհատի կայացմամբ, որը դուրս է գալիս և՛ արգելքների, և՛ հին պատկերացումների դեմ, որոնց մարմնավորումը հայրն է՝ աստվածությունը:

Վիպական մակարդակում հոր և որդու մենամարտը հիմնականում բացատրվում է Դավթի՝ Գյուրջիստանից աղջիկ բերելու փաստով: Արեղյանը մենամարտը բացատրում է Միերի անմիջական նախորդ Արտավազդի առասպելով, որտեղ Արտաշեսը անիծում է Արտավազդին ընթատության համար¹⁶: Թերևս այստեղ նույնպես առկա են ամայրոպի աստծու, երկվորյակների և ժայռում փակված հերոսի առասպելներին բնորոշ տարրեր:

Հոր և որդու բախումը բացատրվում է նաև մեկ այլ տեսանկյունով, որը կապված է Միքրա-Միհր-Միեր ընդհանրությունների հետ: Այստեղ բախումը ներկայացվում է, որպես արևի հին և նոր աստվածությունների բախում:

Հերոս տեսակի մյուս կարևոր հատկանիշը ծիսական մահն է: Հերոսը ժամանակավոր մահ է ապրում և անպայման պետք է հարություն առնի: Կուկասա-Իբերական ժայռում փակված հերոսները, մեր Միերն ու Արտավազդը, նույնպես մեռնող և հարություն առնող հերոսների հատկանիշներ ունեն:

Լեռը կամ քարայրը խորհրդանշում են մուտք հանդերձյալ աշխարհ: Միերը կամ մեռած է, կամ կենդանի և քարայրում ժամանակավոր մահ է ապրում: Արտավազդը չար է, և երբ վերադառնա՝ պետք է աշխարհը կործանի: Իսկ Միերը, ձեռք է բերել մեռնող և հարություն առնող աստվածության գործառնությունը, պտղաբերության և առատության հատկանիշներով:

Այս դրվագով չորրորդ ճյուղը նորից կապվում է երկվորյակների առասպելի հետ, քանի որ շատ հաճախ երկվորյակների գլխավոր գործառնությունը պտղաբերությունն ու առատությունն է:

Միերի վերադարձի հետ կհաստատվի արդարությունը, և ցորենը կլինի «*քանց արժ մի*», և զարին կլինի «*քանց մասուր մի*»: Առատության գործառնությունը բնորոշ է միայն մեր էպոսի Փոքր Միերին: Մնացած դեպքերում նրա նման հերոսները այդպիսի դրսևորումներ չունեն: Հողը այլևս չի կարող տանել Միերի պես դուցազուններին՝ «*աշխարհ դարցեր ա սաղանա*» և կառավարվում է ոչ թե ուժով, այլ խելքով:

Պատմականության տեսանկյունից՝ չորրորդ ճյուղում աշխարհագրական մի քանի անուններից բացի պատմական ոչինչ չկա: Չկա արտաքին թշնամի և համաժողովրդական պայքար: Եթե ինչ-որ կոիվներ կան, ապա լոկ անձնական թշնամիների դեմ են, կամ էլ հոր վրեժը լուծելու համար:

Միայն մի պատումում արհեստականորեն ստեղծվել է բախում թշնամու՝ այս դեպքում Կոզբադիի թոռների հետ, որը անարդյունք է, քանի որ այն հայրենիքի փրկության համար մղվող պայքար չէ, իսկ Կոզբադիի թոռները Սասունի իրական թշնամիները չեն, նրանք նույնիսկ Մարա Մելիքի սերնդից չէին¹⁷:

Էպոսում արտացոլվող պայքարի հիմնական պայմանը հավասար ուժերի առկայությունն է:

Աբեղյանը ենթադրում է, որ Մհերի մախատիպը եղել է Տառնի և Սասունի երկրորդ Մամիկոնյան իշխաններից մի ոմն Մհեր անունով, սակայն ճշտել հնարավոր չէ¹⁸: Պատմական փաստերի փոխարեն Մհերի ճյուղում նկատելի են արևելյան կրոնական համակարգերին բնորոշ տարրեր:

Հնդեվրոպական հիմք առասպելները լայնորեն առկա են հնդեվրոպացիների կրոնական համակարգերում, ինչպիսին է օրինակ Զրադաշտականությունը: Պատահական չէ, որ մեր էպոսի հերոսները բազմաթիվ ընդհանրություններ ունեն հնդիրանական աստվածությունների հետ: Առավել հայտնի և ուսումնասիրված *Միթրա—Միհր—Մհեր* ընդհանրություններից բացի չորրորդ ճյուղում առկա են *Խալդ—Մհեր* տիպաբանական կապեր:

Նախ *«Մհերի դուռը»*, որտեղից պետք է վերածնվեր մեր էպոսի վերջին հերոսը, ուրարտական ժամանակներում կոչվել է *«Ճալդի դուռ»*, ինչը բնորոշում է ուրարտական Խալդիի և Մհերի կերպարային հաջորդականությունը:

Խալդը ուրարտական դիցաբանի գլխավոր աստվածությունն է՝ պատերազմական, պտղաբերության, բուսականության գործառույթներով: Նման գործառույթներ ունի նաև Մհերը: Տիպաբանական հաջորդ կարևոր հատկանիշը Խալդի առյուծային սիմվոլիկան է: Խալդը պատկերվում է առյուծի վրա կանգնած կամ զահին բազմած, որին երբեմն մոտենում է այծի եղջյուրներից բռնած մի կին (Արուբանե կամ Վարուբանե դիցուհին): Այծը նույնպես պատահական չէ, քանի որ վերջինս զոհաբերվում էր միայն Խալդին¹⁹: Էպոսի պատմմաններից մի քանիսում Մհերը թշնամիների հետ հաշվեհարդար է տեսնում այծի ոսկորներով:

Հնդեվրոպական կրոնական համակարգերը համեմատական քննության ենթարկելիս կարևոր է աստվածությունները խմբավորել ըստ նրանց ֆունկցիաների: Այդպիսի մի ունիվերսալ ֆունկցիոնալ սխեմայի հեղինակ է հայտնի հնդեվրոպաբան Ժ.Դյումեզիլը: Նա ցույց է տալիս հնդեվրոպական ժողովուրդների առասպելներում և կրոնական համակարգերում երեք հիմնական ֆունկցիաներ.

1. Գերագույն իշխանություն (քրմական, հմայախրավական),
2. Ռազմական,
3. Տնտեսական (պտղաբերություն, առատություն)²⁰:

Այս եռաճյուղ ֆունկցիոնալ տեսությունը համդես է գալիս և հնդեվրոպական հերոսների և աստվածների դեպքում, տարբեր տեքստերում, լեզուներում, էպոսներում և այլն: Դա ըստ հեղինակի հնդեվրոպական մշակույթի առանձնահատուկ հատկանիշն է, որը ի վերջո համգում է հասարակության եռամաս սոցիալական կառույցին: Այս կառույցը լիովին համդես է գալիս հնդկական, իրանական, հունական, լատինական ցեղերի մեջ:

Տիպաբանական ընդհանրությունները առկա են հնդիրանական Միթրայի և մեր էպոսի երկու Մեերների միջև: Բայց, ինչպես նշվեց, «Մասնա Շոեբում» տեղի է ունեցել կերպարային և ֆունկցիոնալ երկատում, ըստ այդմ էլ լիարժեք համեմատություն մենք կարող ենք կատարել միայն՝ միացնելով երկու Մեերների գործառնությունը:

Միթրան (Ավեստայում Mitra բառացի՝ դաշինք, համաձայնություն) իր ծագմամբ պատկանում է հնդիրանական պանթեոնին: Նրան մենք հանդիպում ենք և Զրադաշտության Ավեստայում և հնդկական Վեդաներում: Եվ հնդկական և պարսկական Միթրաները իրենց ֆունկցիաներով գրեթե նույնանում են:

Հին Հայաստանի հեթանոսական աստված Միհրի մասին շատ քիչ բան է հայտնի, սակայն հիմք ընդունելով, որ հնդեվրոպացիների հավատալիքները պատմական որոշակի շրջանում նույնն են եղել, մենք կարող ենք ենթադրել, որ Միհրը իր ֆունկցիաներով նույնանում է վերը նշված աստվածներին: Միհրի անունը հենց Միթրա անվան բազմաթիվ տարբերակներից մեկն է, ավելի ճշգրիտ, հին իրանական Միթրայի իրանյան արտասանական ձևերից մեկը: Եթե Ավեստայի սրբազան տեքստերում Միթրա անունը թարգմանվում է որպես համաձայնություն, դաշինք, ապա Վեդաներում այն նաև նշանակում է ընկեր կամ դաշինքի երկրորդ մասնակից: Պարսկական Միթրան պաշտպանում է երկիրը գծությունից ու դժբախտությունից և պատժում է նրանց, ովքեր խախտում են դաշինքը, չեն հարգում այն և ծառայում են չարին:

Ռաշի և Առաշի հետ Միթրան մարդկանց եռզինների դատավորն է Չինուատ կամ Յինուատ կամրջին: Միթրայի արևային ֆունկցիան այդքան մեծ չէ Ավեստայում: Այլ իրանական ավանդույթներում Միթրան իհարկե արևի աստվածն է: Հետագայում արևելաիրանական հավատալիքները մի փոքր հեռանում են Ավեստայից և ձևավորվում է միատարր արևի աստված Միթրան: Արեգակի հետ միասին Միթրան նաև սրբազան կրակի մարմնացումն է:

Պետք է նկատի ունենալ, որ իրանական և հնդկական դիցարաններում կան իրար համապատասխանող զույգ աստվածություններ: Ավեստայում *Միթրան* և *Բհագան* են, իսկ Ռիգվեդայում՝ *Միթրան* և *Վարունան*: Հնդկական Միթրայի ֆունկցիաներից է նաև մարդկանց հատուկ հասարակական կա-

ռույցում միավորելը և նրանց հետ դաշինք կնքելը: Այդ դաշինքը նույնամուն է ունիվերսալ տիեզերական օրենքին՝ ռիտային, որը իր էությանը շատ նման է Փոքր Սիեռի քարայրում դրված տիեզերական անվին՝ «*Չարխի ֆալաքին*»:

Այլ սրբազան տեքստերում՝ Բրահմաններում արդեն Միթրան և Վարունան որոշակիորեն հակադրվում են: Վարունան, ի տարբերություն Միթրայի մարդկանց նկատմամբ ավելի դաժան և խիստ է տրամադրված:

Միթրայի գլխավոր սխրանքը առասպելական ցուլի սպանությունն է, որի արյունից էլ հողը կրեորիանա և նորից կծնվի կյանքը: Միթրան պատկերվում է մի երիտասարդի տեսքով, որը պատրաստվում է ցլին սպանել: Նրա գլխավերևում երկու մանուկներ են՝ ծնոքերին ջահեր, ընդորում մի ջահը վերև է պարզած, իսկ մյուսը իջեցված է ներքև: Պատկերի մեջ առկա են նաև շունը, կարիճն ու օձը և կրակի պաշտպան ագռավը:

Մեերը Միթրայի պես կռվում է վիշապների և դեերի հետ: Նա սպանում է սայիտակ դևին: Մեկ այլ դեպքում նա սպանում է «*աշխարհը բանկություն գցած*» առյուծին և ստանում «*առյուծածև*» մականունը: Այս դեպքում առյուծը ուղղակի հանդես է գալիս վիշապների փոխարեն: Դիցաբանության մեջ հաճախակի երևույթ է, երբ կենդանիները փոխարինում են վիշապներին: Առյուծին «*ձևելուց*» մեջտեղից կիսելուց հետո Մեերը ստանում է «*առյուծածև*» մականունը: Այս անունը բացատրվում է նրա արարքով: Սակայն, «*առյուծածև*» մականունը կարող է նշանակել է նաև առյուծի նման, իսկ առյուծը արևի և Միթրայի խորհրդանշան է:

Մեր էպոսում Փոքր Մեերը ունի իր գործակիցները: Էպոսում նրանք անվանվում են՝ Հոթոթ Մոթոթ, Անուշ Բոթոթ, Խոր Մանուկ: Ըստ Կ.Մելիք-Օհանջանյանի՝ Բոթոթ Մոթոթը նույն Միթրայի հետ պատկերվող ջահակիր ոգիներն են՝ Բաութոն և Բաութապատը, իսկ Խոր Մանուկը արևի էին աստվածություն Հվարեն (Hvare) է²¹: Իրանական հավատալիքներով, երբեմն արևի էին և նոր աստվածությունները բախվում են: Էպոսի մակարդակում Միթրայի և Հվարեի հակադրության դրվագը կարող է արտահայտվել Դավթի և Մեերի բախմամբ:

Միթրա-Մեեր ընդհանրությունների հաջորդ կարևոր կետը ագռավի առկայությունն է: Մեերը քարայր է մտնում ագռավի խորհրդով կամ ուղեկցությամբ: Ագռավը համարվում է կրակի պաշտպան սրբազան թռչուն և հանդես է գալիս Միթրայի ուղեկցի դերում, նա նաև արևի էին աստվածության՝ Հվարեի սուրհանդակն է: Ագռավի օգնությամբ նա կապվում է Միթրայի հետ: Բացի այդ նա ուղղակի կրակի պաշտպանի ֆունկցիա ունի: Այստեղից արդեն բխում է, որ Փոքր Մեերը իսկապես ունի կրակի ֆունկցիաներ, հետևաբար նրա քարայրը պետք է կրեր Ագռավաքար անունը: Այսինքն՝ կրակը պարփակվում է հենց իր պաշտպան թռչնի անունը կրող տարածքում:

Պատումների մեծ մասում ագտավը արդեն հանդես չի գալիս, բայց նրա կողմից ցույց տրված «*Վանա քարը*» պահպանվել է, որն էլ հենց սկսել է անվանվել «*Ագտավաքար*»:

Այսպիսով՝ ըստ եռաֆունկցիոնալ սխեմայի՝ Մեծ Մհերը, մույնացվելով *Միթրա-Միհրի* հետ, պետք է կապված լինի առաջին ֆունկցիայի հետ, որն է՝ գերագույն իշխանություն (Մասնա թագավոր), արդարություն, հասարակական համաձայնություն և այլն: Մյուս կողմից Փոքր Մհերը արդեն առաջին ֆունկցիայի երկրորդ՝ հմայաիրավական մասի կրողն է, որը Միթրայի գույգ Վարունային է բնորոշ: Մհերը բացի այս, ունի նաև երկրորդ և երրորդ ֆունկցիաների զգալի հատկություններ: Նա, ինչպես Դավիթը, ռազմիկ է, իսկ կյանքի վերջում ծեռք է քերում պտղաբերության և առատության գործառույթներ: Այս դեպքում նա կարող է համեմատվել Արա Գեղեցիկի, Օսիրիսի, Ատտիսի հետ: Ընդհանրապես այս ֆունկցիաներն էլ իրենց ներսում հակասական են և երկփեղկված, ինչպես առաջին ֆունկցիայի միթրայական և վարունայական կողմերը:

Այսպիսով՝ Մեծ Մհերը արդար է և միայնակ, առանց գեների կովում է առյուծի դեմ: Էպոսի հերոսներից միակն է, որ դաշինք է կնքում հակառակորդի հետ, որով էլ զուգահեռվում է Միթրայի դաշինքի ֆունկցիային (mitra-դաշինք, համաձայնություն), բայց նաև ռազմիկ է, այսինքն կապվում է նաև երկրորդ գործառույթի հետ: Փոքր Մհերը վրիժառու է, բայց արդար, որով էլ առաջին ֆունկցիայի կրողն է: Նա մույնացն ռազմիկ է, այստեղից՝ կապը երկրորդ ֆունկցիայի հետ: Մհերը պետք է վերադառնա երկրում առատության գալստի հետ, այսինքն կապվում է երրորդ՝ առատության ֆունկցիայի հետ: Մեծ Մհերի առյուծածև կոչումը ցույց է տալիս նրա կապը Խալդի սիմվոլ առյուծի հետ: Փոքր Մհերը մտնում է Մհերի դռնից (Խալդի դարպասից) ներս, այսինքն ուղղակի մույնանում է Խալդի հետ: Փոքր Մհերը ժայռի մեջ է մտնում, ենթարկվելով իր ծնողների՝ գերեզմանից ստացած խորհրդին: Աշխարհը դարձել է անարդար և այլևս չի կարողանում պահել նրան²²:

Կապերը և ընդհանրությունները բազմազան են և միանշանակ է միայն այն, որ Փոքր Մհերի բազմաֆունկցիոնալ կերպարը բացառիկ է թե՛ իր հնությամբ և թե՛ էպիկական հատկանիշներով: Կերպարը բարդ է և հակասական, հետևաբար վերջնական եզրակացություններ հնարավոր չէ կատարել: Նույնիսկ ասացողները ներկայացնում են Մհերի ճյառը և չեն կողմնորոշվում ի վերջո՝ հերոսը բարի է, թե չար:

Փոքր Մհերը տիպաբանական ընդհանրություններ ունի թե՛ մեր և թե՛ հարևան ժողովուրդների առասպելական հերոսների հետ: Այդուհանդերձ, իր ներքին հարատույթյամբ ու ֆունկցիոնալ բազմազանությամբ Մհերը հավասարը չունի հնդեվրոպական առասպելաբանության մեջ:

ԾԱՆՈԹԱԳՐՈՒԹՅՈՒՆՆԵՐ

1. Սասնա ծռեր, հատ. Բ, մաս Ա, պատ. Ա, էջ 5:
2. Эмиль, Исследования и статьи, Москва 1896г. стр. 8.
3. Մ. Արեղյան, Հայ ժողովրդական վեպը, Թիֆլիս, 1908, էջ 180-181:
4. Մ. Կանայանց, Ջեօրանց տան պատմականը, Վաղարշապատ, 1907, էջ 170:
5. Մ. Արեղյան, նշվ. աշխատություն, էջ 170, 88:
6. Ս.Հարությունյան, Հայ ժողովրդական վեպը (կուլտուր-պատմական ակնարկ), Սասնա Ծռեր, Երևան, 1977:
7. Ա. Պետրոսյան, Հայկական էպոսի հնագույն ակունքները, Երևան, 1997:
8. Ա. Եղիազարյան, «Սասնա Ծռեր» էպոսի պոետիկան, Երևան, 1996:
9. М. Элиаде, Космос и история, Москва 1987:
10. Мифы народов мира, Москва 1990, стр. 174.
11. Նույն տեղում, էջ 176:
12. Սասնա Ծռեր, հատոր Բ, պատում Ա:
13. Սասնա Ծռեր, հատոր Ա, պատում Ե:
14. Սասնա Ծռեր, հատոր Ա, պատում Ի-Դ:
15. Սասնա Ծռեր, հատոր Ա, պատում Զ:
16. Մ.Արեղյան, Երկեր, հատոր Ա, էջ 424:
17. Սասնա Ծռեր, հատոր Ա, պատում Ը:
18. Մ. Արեղյան, Երկեր, հատոր Ա, էջ 374:
19. Ա.Հմայակյան, Ուրարտական խաղի և Արթանե աստվածությունների մասին, ԴԲՀ, 1982/2:
20. Ж. Дюмезиль, Верховные боги индоевропейцев, Москва 1986. Стб նաև՝ Ս. Անյան, Սասնա Ծռեր էպոսը և հնդեվրոպական երեք ֆունկցիաները, ԴԲՀ 1985/1:
21. Կ. Մելիք-Օհանջանյան, Միբրա-Միհրը Սասնա ծռերի մեջ, Երևան 1946: